



粵海關志卷二

前代事實

臣謹按馬端臨作文獻通考立市糴門以市易與互市並列竊以爲二者名同而實異也市易之法原於均輸和買曰貸息曰抵當曰貿遷以縣官而行黠商豪賈之所爲究之物價騰踴商民怨讟此新法所以亂天下也若互市則誠所謂以其所有易其所無矣無抑配之弊無科率之煩收征稅之入省戍守之費華夷交資其用



公私均享其利故自漢至今行之不改在陸路者曰互市在海道者卽曰市舶其設官也肇於唐其立制也備於宋然有明中葉又時通時罷者何哉蓋宋之市舶主於助國用明之市舶主於總貨寶有所利而爲之勢必有委曲以事彌縫侵漁以快壟斷者求其萬全豈可得乎我

國家經費有常不資商權不貪爲寶無取珍奇惟

推

柔遠之懷爲便民之舉衡之前代原不可同年而語

顧不知前代之所以失無由知我

朝之所以得法積久而大備則前事之師固鑒古者所不廢也謹敘兩漢六朝通商之事而唐宋以來市舶按時代編焉

漢

漢高帝十一年遣陸賈立趙佗爲南越王與剖符通使和集百越毋爲南邊患害與長沙接境高后時有司請禁南越關市鐵器佗曰高帝立我通使物今高后聽讒臣別異蠻夷隔絕器物

此必長沙王計也

史記南越尉佗傳

謹案宋趙汝适作諸番志序以為禹貢載島夷卉服厥篚織貝為蠻夷通貨中國之始不知夏書所言專謂職貢非通市也惟趙佗傳言南越關市鐵器當為通市之始宋史食貨志言互市舶法始於漢初與南粵通關市是也故首載之

粵地處近海多犀象瑇瑁珠璣銀銅果布之湊中國往商賈者多取富焉番禺其一都會也自

合浦徐聞南入海得大州東南西北方千里武帝元封元年略以為儋耳珠厓郡元帝時罷棄之自日南障塞徐聞合浦船行可五月有都元國又船行可四月有邑盧沒國又船行可二十餘日有諶離國步行可十餘日有夫甘都盧國自夫甘都盧國船行可二月餘有黃支國民俗略與珠厓相類其州廣大戶口多多異物自武帝以來皆獻見有譯長屬黃門與應募者俱入海市明珠璧流離奇石異物齎黃金雜繒而往

所至國皆稟食為耦蠻夷賈船轉送致之亦利
交易剽殺人又苦逢風波溺死不者數年來還
大珠至圍二寸以下平帝元始中王莽輔政欲
耀威德厚遺黃支王令遣使獻生犀牛自黃支
船行可八月到皮宗船行可二月到日南象林
界云黃支之南有已程不國漢之譯使自此還

矣漢書地理志

後漢

交趾之南有越裳國周公居攝六年越裳以三

象重譯而獻白雉周德既衰於是稍絕及楚子
稱霸朝貢百粵秦并天下威服蠻夷始開嶺外
置南海桂林象郡漢興尉佗自立為南越王傳
國五世至武帝元鼎五年遂滅之分置九郡元
帝初元三年罷珠厓逮王莽輔政元始二年日
南之南黃支國來獻犀牛世祖建武十二年九
真徼外蠻里張游率種人慕化內屬明年南越
徼外蠻夷獻白雉白兔肅宗元和元年日南徼
外蠻夷究不事人邑豪獻生犀白雉安帝永初

元年九真徼外蠻夷舉土內屬延光元年九真
徼外蠻貢獻內屬三年日南徼外蠻復來內屬
順帝永建六年日南徼外葉調王便遣使貢獻
永和二年日南象郡徼外蠻夷亂交阯刺史樊
演發兵救之反為所攻公卿百官皆議遣將發
兵大將軍從事中郎李固駁之四府悉從固議
拜祝良為九真太守張喬為交阯刺史由是嶺
外復平靈帝建寧三年烏滸人內屬皆受冠帶
熹平二年日南徼外國重譯貢獻六年復來貢

獻後漢南蠻西
南夷交阯傳

孟嘗遷合浦太守郡不產穀實而海出珠寶與

交阯比境常通商販貿糴糧食後漢書
本傳

六朝

西南夷訶羅陁國宋元嘉七年遣使奉表願勅

廣州時遣舶還不令所在有所陵奪宋書夷
蠻傳

扶南國在日南郡之南海西大灣中去日南可

七千里在林邑西南三千餘里城去海五百里

其南界三千餘里有頓遜國在海崎上地方千

里城去海十里頓遜之東界通交州其西界接天竺安息徼外諸國往還交市所以然者頓遜迴入海中千餘里漲海無崖岸船舶未曾得逕過也其市東西交會日有萬餘人珍物寶貨無所不有

梁書海南諸夷傳

海南諸國大抵在交州南及西南大海洲上相去或四五千離遠者二三萬里其西與西域諸國接漢元鼎中遣伏波將軍路博德開百越置日南郡其徼外諸國自武帝以來皆朝貢後漢

桓帝世大秦天竺皆由此道遣使貢獻及吳孫權時遣宣化從事朱應中郎康泰通焉其所經過及傳聞則有百數十國因立記傳晉代通中國者蓋鮮故不載史官及宋齊至梁其奉正朔修貢職航海往往至矣

南史海南諸國傳

梁蕭勵爲廣州刺史廣州邊海舊饒外國舶至多爲刺史所侵每年舶至不過三數及勵至纖

毫不犯歲十餘至

南史梁宗室傳

王僧孺爲南海太守郡常有高涼生口及海舶

每歲數至外國賈人以通貨易舊時州郡以半價就市其利數倍僧孺並無所取

梁書本傳

唐

唐始置市舶使以嶺南帥臣監領之設市區令

蠻夷來貢者為市稍收利入官凡舟之來最大

者為獨檣船能載一千婆蘭

胡人謂三百斤為一婆蘭

次曰

牛頭船比獨檣得三之一又次曰三木船曰料

河船遞得三之一

謹按此數語顧氏採之宋史食貨志

貞觀十七

年詔三路舶司番商販到龍腦沈香丁香白豆

蔻四色並抽解一分武后時都督路元叡冒取

番酋貨舶酋不勝忿殺之開元初市舶使周慶

立與波斯僧造奇巧以進劾罷又罷遣使者之

南海求珠翠者

開元四年有湖人上言南海多珠翠奇寶可往營致因言市舶

之利又欲往師子國求靈藥及善醫之姬置之

宮掖上命監察御史楊範臣與胡人偕往求之

範臣從容奏曰陛下前年焚珠玉錦繡示不復

用今所求者何以異於所焚者乎彼市舶與商

賈爭利殆非王者之體胡藥之性中國多不能知况於胡姬豈宜置之宮掖夫御史天子耳目之官必有軍國大事臣雖觸冒灾瘴死不敢辭此特胡人眩惑求媚無益聖德竊恐非陛下意願熟思之上遽自引咎慰諭而罷之

後於廣州設結好使每番舶

至則審事宜以聞時諸番多所更改林邑號環
王而真臘亦號文單皆嘗犯邊元和中安南都
護張舟擊敗之乃復銅柱以正疆場於是貢琛
溢於王府其後節度使馬總又鑄二柱以繼之
貞元時波斯波羅二國人貢多珍物節度使王
處休奉宣威德撫令市易常供外一無所取其
後以軍興漸加市稅太和中文宗下詔除之

郡國

利病書

南海舶外國船也每歲至安南廣州師子國舶

最大梯上下數丈皆積寶貨至則本道奏報郡
邑為之喧闐有番長為主領市舶使藉其各物

納舶脚禁珍異番商有以欺詐入牢獄者

李肇國史

補

廣德元年十二月廣州市舶使呂太一反逐其

節度使張休

新書代宗紀

文宗太和八年疾愈德音南海番舶本以慕化
而來固在接以恩仁使其感悅思有矜恤以示
綏懷其嶺南福建及揚州番客宜委節度觀察

使常加存問除船脚收市進奉外任其來往

通流自為交易不得重加率稅文苑英華

王方慶拜廣州都督廣州地際南海每歲有崑

崙乘船以珍物與中國交市舊都督路元睿冒

求其貨崑崙懷及殺之方慶在任數載秋毫不

犯舊書本傳

柳澤開元中監嶺南選時市舶使右威衛中郎

將周慶立造奇器以進澤上書言慶立雕製詭

物造作奇器用浮巧為珍玩以譎怪為異寶乃

治國之巨蠹明主所宜嚴罰者也書奏元宗稱

善新書本傳

王鏐遷廣州刺史嶺南節度使西南大海中諸

國船至則盡沒其利由是鏐家財富於公藏日

發十餘艇重以犀象珠貝稱商貨而出諸境周

以歲時循環不絕凡八年舊書本傳

盧奐為南海太守遐方之地貪吏斂迹人用安

之以為自開元已來四十年廣州節度清白者

有四謂宋璟裴奩先李朝隱及奐中使市舶亦

不干法

舊書盧懷慎傳

徐申進嶺南節度使外番歲以珠璣瑁香文犀

浮海至申於常貢外未嘗贖索商賈饒盈

新書本傳

李勉除廣州刺史兼嶺南節度使前後西域船

泛海至者歲纔四五勉性廉潔船來都不檢閱

故末年至者四十餘

舊書本傳

孔戣元和十二年拜嶺南節度使番船泊步有

下棧稅始至有閩貨宴所餉犀珙下及僕隸戣

禁絕無所求索舊制海商死者官籍其貲滿三

月無妻子詣府則沒入戣以海道歲一往復苟

有驗者不為限悉推與

新書孔巢父傳

盧鈞開成元年為廣州刺史御史大夫嶺南節

度使南海有蠻船之利珍貨輻輳舊帥作法興

利以致富凡為南海者靡不捆載而還鈞性仁

恕為政廉潔請監軍領市舶使已一不干預

舊書

本傳

韋正貫宣宗立擢嶺南節度使南海船賈始至

大帥必取象犀明珠上珍而售以下直正貫既

至無所取吏咨其清

新書章
舉傳

陸贄論嶺南請於安南置市舶中使狀曰嶺南節度經略使奏近日船舶多往安南市易進奉事大實懼闕供臣今欲差判官就安南收市望定一中使與臣使司同勾當庶免欺隱希顏奉宣聖旨宜依者遠國商販唯利是求廣州地當要會俗號殷繁交易之徒素所奔轅今忽捨近而趨遠棄中而就偏若非侵刻過深則必招懷失所且嶺南安南莫非王土中使外使悉是主

臣若緣軍國所需皆有令式恆制人思奉職孰敢闕供豈必信嶺南而絕安南重中使而輕外使殊失推誠之體又傷賤貨之風望押不出

陸
宣

公奏
議

韓愈送鄭尚書序其海外雜國若耽浮羅流求毛人夷亶之州林邑扶南真臘于陀利之屬東南際天地以萬數或時候風潮朝貢蠻胡賈人舶交海中若嶺南帥得其人則一邊盡治不相寇盜賊殺無風魚之災水旱厲毒之患外國之

貨日至珠香象犀瑇瑁奇物溢於中國不可勝

用昌勅集

宋

市舶司掌市易南番諸國物貨船舶而至者初於廣州置司以知州為使通判為判官及轉運使司掌其事又遣京朝官三班內侍三人專領之後又於杭州置司淳化中徙置於明州定海縣命監察御史張肅主之明年肅上言非便復於杭州置司咸平中又命杭明州各置司聽番

客從便若舶至明州定海縣監官封船荅堵送州凡大食古邏閣婆占城勃泥麻逸三佛齊賓同隴沙里亭丹流眉並通貨易以金銀緡錢鉛錫雜色帛精麤瓷器市易香藥犀象珊瑚琥珀珠鉞寶鐵鼈皮瑇瑁瑪瑙碑磔水晶番布烏櫛蘇木之物太平興國初京師置權易院乃詔諸番國香藥寶貨至廣州交趾泉州兩浙非出於官庫者不得私相市易後又詔民間藥石之具恐或致闕自今惟珠貝瑇瑁犀牙寶鐵鼈皮珊

瑚瑪瑙乳香禁權外他藥官市之餘聽市貨與民其後二州知州領使如勸農之制通判兼監而罷判官之名每歲止三班內侍專掌轉運使亦總領其事大抵海舶至十先征其一其價直酌番貨輕重而差給之

宋會要

開寶四年六月命同知廣州潘美尹崇珂並充市舶使以駕部員外郎通判廣州謝處玘兼市

舶判官

宋會要

太平興國元年五月詔敢與番客貨易計其直

滿一百文以上量科其罪過十五千以上黥面

配海島過此數者押送赴闕婦人犯者配充針

工淳化五年二月又申其禁四貫以上徒一年

遞加二十貫以上黥面配本地充役兵

宋會要

太平興國二年正月命著作佐郎李鵬舉充廣

南市舶使

宋會要

太平興國七年閏十二月詔聞在京及諸州府

人民或少藥物食用今以下項香藥止禁權廣

南漳泉等州船舶上不得侵越州府界紊亂條

法如違依條斷遣其在京并諸處即依舊官場
出賣及許人興販凡禁權物八種瑇瑁牙犀寶
鐵髓皮珊瑚瑪瑙乳香放通行藥物三十七種
木香檳榔石脂硫黃大腹龍腦沈香檀香丁香
丁香皮桂胡椒阿魏蒔蘿華澄茄訶子破故紙
荳蔻花白荳蔻鵬沙紫礦胡盧芭盧會華撥益
智子海桐皮縮砂高良薑草荳蔻桂心苗沒藥
煎香安息香黃熟香烏楠木降真香琥珀後紫
礦亦禁權 宋會要

雍熙二年九月己巳禁海賈 宋史太宗紀

雍熙四年五月遣內侍八人齎勅書金帛分四
綱各往海南諸國勾招進奉博買香藥犀牙珍
珠龍腦每綱齎空名詔書二道於所至處賜之

宋會要

淳化二年四月詔廣州市舶每歲商人船舶官
盡增常價買之良楛相雜官益少利自今除禁
權貨外他貨擇良者止市其半如時價給之麤
惡者恣其賣勿禁 宋會要

謹按宋史食貨志載此條又云歲約獲五十餘萬斤條株顆

至道元年三月詔廣州市舶司曰朝廷綏撫遠俗禁止末游比來食祿之家不許與民爭利如官吏罔顧憲章苟徇貨財潛通交易闌出徼外私市掌握之珍公行道中靡虞蕙苴之誦永言貪冒深蠹彝倫自今宜令諸路轉運司指揮部內州縣專切糾察內外文武官僚敢遣親信於化外販鬻者所在以姓名聞

宋會要

至道元年六月詔市舶司監官及知州通判等今後不得收買番商雜貨及違禁物色如違當重置之法先是南海官員及經過使臣多請託市舶官如傳語番長所買香藥多虧價直至是左正言馮拯奏其事故有是詔

宋會要

大中祥符二年八月九日詔杭廣明州市舶司自今番商齎鏹石至者官爲收市斤給錢五百以初立禁科也時三司定直斤錢二百詔特增其數

宋會要

大中祥符九年九月十八日太常少卿李應機言廣州勾當市舶司使臣自今後望委三司使副使判官或本路轉運使奏廉幹者充選從之

宋會要

天禧三年十月供備庫使時其昌言廣州市舶庫門舊令鈴轄監閱望止於都監押內輪司其事從之

宋會要

天禧四年六月右諫議大夫李應機言廣州通判係審官院差緣兼市舶公事望自今中書選

差候得替日如不虧遞年課額特與改官優加任使其市舶使臣亦候得替依押香藥綱使臣例遷轉親民任使詔廣州通判於京朝官中選累有人奏舉者具名取旨其市舶依所請施行

宋會要

天聖五年九月自今遇有船船到廣州博買香藥及得一兩綱旋具聞奏乞差使臣管押

宋會要

天聖六年七月十六日詔廣州近年番船罕至令本州與轉運司詔誘安存之

宋會要

天聖八年六月詔廣州監市舶司使臣自今三班院依揀走馬承受使臣例選取三人各會有舉主三人已上者具脚色姓名供申樞密院其差出使臣如在任終滿三年委實廉慎別無公私過犯仍令本路轉運使副保奏當與酬獎

宋會

要

景祐五年九月七日太常少卿直昭文館任中師言臣在廣州奉勅管勾市舶司使臣三人通判二人亦是管勾市舶司使臣並同勘會所使

印是市舶使字乞自今少卿監以上知廣州並兼市舶使入衙內兩通判亦充市舶判官或主轄市舶司事管勾使臣並申狀詔知州徐起兼市舶使今後少卿監已上知州兼市舶使餘不行

宋會要

仁宗時詔杭明廣三州置市舶司海舶至者視所載十算其一而市其三海舶歲入象犀珠玉香藥之類皇祐中總其數五十三萬有餘

文獻通考

熙寧四年五月十二日詔應廣州市舶司每年

抽買到乳香雜藥依條計綱申轉運司召差廣南東西路得替官往廣州交管押上京送納事故充替之人勿差至元符三年六月十一日廣東轉運司奏欲於上京送納字下添入如逐路無官願就卽不限路分官員並許召差如無官仍約定綱數申省乞差軍大將裝押字從之

宋會要

熙寧七年正月一日詔諸船舶船遇風信不便飄至逐州界速申所在官司城下委知州餘委通

判或職官與本縣合依男已結檢除不係禁物

稅訖給付外其係禁物卽封堵差人押赴隨近

市舶司勾收抽買諸泉福緣海州有南番海南

物貨船到並取公據驗認如已經抽買有稅務

給到回引卽許通行若無照證及買得未經抽

買物貨卽押赴隨近市舶司勘驗施行諸客人

買到抽解下物貨並於市舶司請公憑引日許

往外州貨賣如不出引日許人告依偷稅法

宋會要

熙寧七年七月十八日詔廣東路提舉司劾廣州市易務勾當公事呂邈以擅入市舶司拘攔番商物故也十九日詔廣州市舶司依舊存留更不併歸市易務

宋會要

熙寧九年五月二日中書門下言給事中集賢殿修撰程師孟乞罷杭州明州市舶司只就廣州市舶司一處抽解欲令師孟赴三司同共詳議利害以聞三司言今與師孟同共詳議明廣州市舶利害先次刪立抽解條約詔恐逐州有

未盡未便事件令更取索重詳定施行

宋會要

元豐三年八月二十七日中書言廣州市舶條

已修定乞專委官推行詔廣東以轉運使孫迥

廣西以轉運使陳倩兩浙以轉運副使周直孺

福建以轉運判官王子京迥直孺兼提舉推行

倩子京兼覺察拘攔其廣南東路安撫使更不

帶市舶使

宋會要

元豐五年十月十七日廣東轉運副使兼提舉市舶司孫迥言南番綱首持三佛齊詹畢國主

及主管國事國主之女唐字書寄臣熟龍腦二百二十七兩布十三疋臣昨奉委推行市舶法臣以海舶法徹商旅輕於冒禁每召賈胡示以條約曉之以來遠之意今幸刑戮不加而來者相繼前件書物等臣不敢受乞估直入官委本庫買綵帛物等候冬船回報謝之所貴通異域之情來海外之貨從之

宋會要

元豐五年十二月二十一日廣西轉運副使吳潛言雷化發船之地與瓊島相對今令倒下廣

州請引約五千里不復管乞廣西沿海一帶州縣如土人客人以船載米穀牛酒黃魚及非市舶司抽解之物並更不下廣州請引詔孫迥相度於市舶法有無妨礙

宋會要

元祐元年杭明廣三州市舶是年收錢糧銀香藥等五十四萬一百七十三緡匹斤兩段條箇顆臍隻粒支二十三萬八千五十六緡匹斤兩

段條箇顆臍隻粒

文獻通考

元祐五年十一月二十九日刑部言商賈許由

海道往來番商興販並具入舶物貨名數所詣去處申所在州仍召本土物力戶三人委保州爲驗實牒送願發舶州置簿給公據聽行回日許於合發舶州住舶公據納市舶司卽不請公據而擅乘舶自海道入界河及往高麗新羅登萊州界者徒二年五百里編管往北界者加二等配一千里並許人告捕給舶物半價充賞其餘在舶人雖非船物主並杖八十卽不請公據而未行者徒一年鄰州編管賞減擅行之半保

人並減犯人三等從之

宋會要

元符二年五月十二日戶部言番舶爲風飄着

沿海州界若損敗及船主不在官爲拯救錄物貨許其親屬召保認還及立防守盜縱詐冒斷

罪法從之

宋會要

崇寧三年五月二十八日詔應番國及土生番客願往他州或東京販易物貨者仰經提舉市舶司陳狀本司勘驗詣實給與公憑前路照會經過官司常切覺察不得夾帶禁物及姦細之

人其餘應有關防約束事件令本路市舶司相
度申上書省先是廣南路提舉市舶司言自來
海外諸國番客將寶貨渡海赴廣州市舶務抽
解舉民間交易聽其往還許其居止今來大食
諸國番客乞往諸州及東京買賣未有條約故
有是詔 宋會要

崇寧四年五月二十日詔每年番船到岸應買
到物貨合行出賣並將在市實直價例依市易
法通融收息不得過二分從廣南提舉市舶司

請也

宋會要

崇寧五年三月四日詔廣州市舶司舊來發船
往來南番諸國博易回元豐三年舊條只得却
赴廣州抽解後來續降沿革不同今則許於非
元發舶州往舶抽買緣此大生奸弊虧損課額
可將元豐三年八月舊條與後來續降衝改參
詳從長立法遵守施行 宋會要

大觀元年三月十七日詔廣南福建兩浙市舶
依舊復置提舉官 宋會要

政和四年五月十八日詔諸國番客到中國居住已經五世其財產依海行無合承分人及不

經遺屬者並依戶絕法仍入市舶司拘管宋會要

宣和三年十一月二十六日詔諸路市舶本錢

並依茶鹽錢已得指揮宋會要

宣和四年五月九日詔應諸番國進奉物依元

豐法更不起發就本處出賣倘敢違戾市舶司

官以自盜論宋會要

宣和七年三月十八日詔降給空名度牒廣南

福建路各五百道兩浙路三百道付逐路市舶

司充折博本錢仍每月具博買并抽解到數目

申尙書省宋會要

粵海關志卷二終

